

համակիր հայերը է՛լ աւելի բարեկամանում էին նրանց հետ՝ աստիճանաբար յարելով կաթողիկոսութեան:

Այս կարգի անձերից էին, ուրիշ շատերի թւում, եւ այն ժամանակուան երկու երեւելի դէմքերը՝ Մխիթար վարդապետ Սեբաստացին եւ տէր Կոմիտաս Քէչոմուրճեանը: Վերջինը դուրս է ներկայ յօղուածի սահմաններից եւ արժէ որ առանձին հետազոտութեան նիւթ դառնայ: Իսկ Մխիթար Սեբաստացու գործունէութեան կը ծանօթանանք հէնց հիմա ամփոփ գծերով, որքան որ նա անդրադարձել է իր հիմնած միաբանութեան ճակատագրի վրայ:

Մանուկը (հետագային հոգեւորական անունով Մխիթար) ծնուել է 1676 թ. Փետր. 7-ին Սեբաստիայում, մի համեստ ընտանիքի մէջ: Հօր անունն էր Պետրոս, մօրը՝ Շահրիստան: Դեռ մանուկ հասակից սկսած, Մանուկը աչքի էր ընկնում կրօնական զգացմունքով եւ առանձին հետաքրքրութեամբ դէպի կրօնական հարցերը: 15 տարեկան, նա արդէն ձեռնադրուում է սարկաւազ Մխիթար անունով: Այդ հասակից սկսւում է նրա հոգեւորական կեանքն ու գործունէութիւնը: Նա շատ էր սովորում, այցելում էր իրենց գիտնական վարդապետներով յայտնի վանքերը, ամէն տեղ հաւաքում էր ինչ որ կարելի էր հաւաքել կրօնական գիտութեան գանձարանից: Իր այդ ճանապարհորդութիւնների ժամանակ, Հայաստանում, նա մէկից աւելի անգամներ հանդիպում էր միսիոնարներին, որոնք բացատրում էին նրա վիճելի խնդիրները, տալիս էին հայերէն հոգեւոր գրքեր, հրատարակուած մեծ մասամբ Հռովմում, եւ, ըստ երեւոյթին, շատ բարձր էին դնահատում այդ հարցասէր ու տաղանդաւոր պատանուն, որ զարմացնում էր նրանց իր յարատեւութեամբ, կրօնական զգացմունքի խորութեամբ եւ անկեղծութեամբ, ուսման անյազ ծարաւով եւ ամուր ցանկութեամբ իր ձեռք բերած զարգացման պտուղները սեփականութիւն դարձնելու իր անհունօրէն սիրելի հայ ժողովրդին: Սրատես միսիոնարները անմիջապէս հասկացան, թէ ի՞նչ թանկագին նուաճում կը լինի այդ պատանու գրաւումը իրենց կողմ: Այդ պատճառով, հէնց առաջին հանդիպումից Մխիթարին տալիս են յանձնարարականներ իրենց

կենտրոնական հիմնարկութիւններին եւ սրանց ուշադրութիւնը հրաւիրում են նրա վրայ\*):

Մխիթարին, ի հարկէ, պարզ չեն նրանց նպատակները՝ հայերին կաթողիկոսեան դարձնելը, հայոց եկեղեցու միացումը կաթողիկ եկեղեցուն՝ հրաժարուելով հայ ազգային եկեղեցու հերձուածից եւ դաւանութիւններից ու աւանդութիւններից: Մենք արդէն տեսանք, թէ միսիոնարները ինչպիսի ճարպիկութեամբ թագնում էին իրենց քամահրանքը հայոց եկեղեցու նկատմամբ՝ նոյնիսկ հայերէն կեղծ բնագիրների հրատարակութեամբ: Եւ Մխիթարը, ճաշակելով բարւոյ եւ չարի գիտութեան ծառի պտուղներից, սկսում է ձգտել Կ. Պոլիս, որ այն ժամանակ միսիոնարական կազմակերպութիւնների եւ սրանց կրթական ու դաստիարակչական գործունէութեան կենտրոնն էր: Շատ երոպացիներ եւ, մանաւանդ, Եւրոպայի ամէն կողմերը ցրուած հայերը սիրով յաճախում էին այդ կենտրոնը եւ տեղական հայերին

\* ) Մինչեւ այսօր էլ վէճի առարկայ է այն հարցը, թէ ի՞նչ կրթութիւն է ստացել Մխիթարը՝ հայկազան, հետագային մի քիչ լրացուած կաթողիկ միսիոնարների հետ ունեցած հանդիպումների ժամանակ, թէ՞ կաթողիկ՝ ճիզուխ վարդապետներից: Վենետիկի Մխիթարեանները, ահաբեկուած այն հաւածանքներից, որ յարուցին Պրոպագանտայի կողմնակից (կոլէճցի) հայ կաթողիկները, որոնք Մխիթարի մահուան օրից հէնց սկսած մեղադրում էին նրան հերձուածքի ու հերետիկոսութեան մէջ եւ մինչեւ այսօր էլ չեն դադարում ամբաստանելուց, — ի դուր ձգնում են ասպացուցանել, որ Մխիթարը կրթութիւն է ստացել ճիզուխ հայերից, որոնց հանդիպել է Հալէպում: Վենետիկցիների հակաակորդները պնդում են, որ Մխիթարը ըստացել է դուռ հայկական կրթութիւն, մի բան, որ, ի հարկէ, ճշմարտութիւն է: Մխիթարը մինչեւ մահ էլ վատ էր հասկանում լատիներէն եւ իտալերէն լեզուները եւ նրա բոլոր գրուածքները հիմնուած են հայ եկեղեցական հայերի հայերէն հեղինակութիւնների ու բնագրերի, կամ յունական ու լատին եկեղեցիների հայերի գրուածքների հայերէն թարգմանութեանց վրայ: